

Aruba Music Explosion lo duna realse na Aruba su promocion den exterior

'3 dia di concierto presenta pa S&E Enterprise'

ORANJESTAD - Na luna di September Aruba lo ta sede di un magno evento yama Aruba Music Explosion. Siman pasa e organisadonan esta S&E Enterprise a tene un rueda di prensa pa asina introduci e concepto di e evento aki cual lo tuma luga den Piedra Plat Entertainment Center dianan 22, 23, y 24 di September 2011. Un Piedra Plat Entertainment Center cu lo wordo transforma pa asina brinda e evento di calidad.

Algun luna atras S&E Enterprise a acerca diferente companianan pa presenta nan idea y nan concepto pa asina aki por wak si nan lo por haya algun patrocinado. Cu exito nan a logra haya aporte di Gobierno di Aruba, Aruba Tourism Authority, Aruba Airport Authority como tambe di De Palm Tours

kende nan a yega na un acuerdo pa ta e 4 patrocinadonan.

Riba diahuebs 22 di september lo presenta Michael Bolton y Air Supply. Diabierna 23 di september lo tin presentacion di e cantantenan Gilberto Santa Rosa y Olga Tañon y riba diasabra 24 di september lo presenta Luis Fonsi, Servando y Florentino y Felipe Paez. Un evento cu tanto artistanan renombra internacional. Aruba Tourism Authority a dicidi pa aporta na e evento aki mirando cu e mercado di Latino America ta un mercado creciente y alabes mirando cu luna di September ta un luna cu ta cai den 'low season'. Aruba Music Explosion lo trece oportunidad pa yena cambenan di hotel y alabes treciendo mas bishitante pa Aruba. Meritonan pa e inversion aki

ta basa entre otro riba e hecho cu e evento ta enfoca primordialmente riba e mercado di Venezuela, cu ta e mercado cu e "average daily expenditure" mas halto pa Aruba, pues e bishitantenan ta gasta promedio pa dia mas cu tur otro bishitantenan di otro mercadonan. Tambe e renombre di esnan cu ta forma parti di S&E Enterprise ta duna e confiansa cu e evento lo ta uno di calidad y cu e organizacion por logra atrae bishitante den e mercado. E demanda pa un evento asina t'ey tambe den e mercado y pues por capitalisa di esaki. ATA ta un sponsor y como sponsor ta cera un contract cu e compania aki pa sigura cu meta nan pa cual ATA ta dicidi di sponsor ta cubri den un contract asina. Derecho y obligacionnan

di ambos partido ta inclui den un documento asina cu ta bin di parti di ATA, cu porcierto ta basta estricto. Lo evalua e evento mirando e resultadonan despues cu e evento a tuma luga pa determina si e inversion a "pay off". Pa ATA ta importante pa inversion nan conduci na mas turista. Turistanan di un cierto "calidad" cu ta conduci na su turno na mas ingreso pa nos isla/den nos economia! Esaki lo ta parti di e evaluacion, manera ta e caso cu otro evento nan tambe cu ATA ta patrocina.

Pa mas informacion di e artistanan y di e concierto nan general, por subi e website www.arubamusic-explosion.com. Oficina di S&E Enterprise ta ubica na Aruba, na Paseo Herencia y tambe tin un oficina na Caracas. □